

لوكان
أيمن أمين

لو كان / شعر
أيمن أمين
الطبعة الأولى ، ٢٠٠٩



دار اكتب للنشر والتوزيع
القاهرة ، أش المعهد الديني ، المرج
هاتف : ٠٢٢٤٤٠٥٠٤٧
موبايل : ٠١٢٩٢٥١٥٩٢ - ٠١٨٢٣٦٣٠٣٥
E – mail : dar_oktob@gawab.com
المدير العام :
يحيى هاشم
رقم الإيداع : ٢٠٠٩/٢٦٥١٨
I.S.B.N: ٩٧٨-٩٧٧-٦٢٩٧-٦٦-٤
جميع الحقوق محفوظة ©

لوكان

شعر

أيمن أمين

الطبعة الأولى

٢٠٠٩



دار اكتب للنشر والتوزيع

إهداء

إلى من علّمتني الحب ..

أمي

وإلى المعنى النابض بين ضلوعي ..

زوجتي

شكراً وتقدير

للصديق والاستاذ الشاعر / الحسن عباس مسعود

(المرأة الصادقة)

مع تحياتي

للشاعر الكبير / عبد الناصر علام

آخر رسايل سندباد

أفتح كفي
أسأل عنك
ألقى فـ كفي الثاني إسمك
عارف إني ولسه بحبك
هافضل راسمك
جوّه تاريخي
جوّه ملامحي
جوّه خطوط الحزن الغاير
جوّه ضلوعي
هافضل أمشي
إياك تنسى
إن الخط دا غير الخط
من غير شرط
وانا وصغير
كنت وبارسم

حلمي فـ ورقه ٠٠

فـ ديل طياره

وبسناره

كنت وباغزل توب الفرح

فوق الموج الغاضب دائماً

كنت وبرحل

كنت وبحكي

ألف حكايه

جوه القمم

كام ضحكايه عدت مني

غصبن عني

هاكتب ليكي انا آخر سطر

مش راح نبقى مره لبعض

آخرُ لُقا

من سنين
زي النهارده
تحت حَبّات المطر
إنت فاكِره؟
لسه فاكر يا حبيبي إنت مين
آه عليك
آه عليا
لسه برضه أقول حبيبي
لو مكنش ليك إنت
راح أقولها يوم لـمين
فاكره يومها؟
التقينا فـ يوم حزين
إتفقنا
إختلفنا
مش هاتفرق

المهم في القرار
والقرار
كان فرار من الظروف
والظروف كانت أقوى م الحنين
يومها فأكبر
وردة دبلت في الإيدى
والعين اتسمرت واتصورت
اللي جاي في الحظتين
يومها جفت الدموع
والسؤال من غير إجابته
جوة صمت المغرمين
يومها فأكبر
الخطاوي في الطريق
مشيناها . .
كثير كثير متشبهين
برضه حزن من سنين
والقصيدة عا الورق

جه الخريف ويا المطر
كلمتين مفضلش منها
لخصت عجزى وصمى
عجزى احميك
و احمى نفسي من الفرق
الأمل قدامنا مات
والإيدين متكثفين
ارحميني
مش بإيدي
إرحميني
مش ضعيف
يكفى إني انتحرت
يومها قدامك
من سنين

انكسار

لسه بتدور السواقى
ليه يا أرضي لسه بور
قولي . . هل ف العمر باقى؟
ولآ أسكن فى القبور
ليه يا أيامي بطيئه؟
والسنيين زى الدهور
وانا أهو ع الشط واقف
لسة بحلم لي بنور
كنت فاكر إني وحدي
لما بصيت ف الطابور
عمري مني ينسرق
كيف راح أسرق . .
علشان الفجر نور
يا شراعات الأمل
عايز أعدي في البحور

ليه مراكي مكسره؟
فين في قلب الضلمه نور
لسه فيا انعكشه
لسه ساكن في الشقوق
لسه خايف
خايف أطلع من الجحور
لسه حاسس إني وحدي
وسط زحمة م المرور
وكل ماجي أبقى فوق
بالسلاسل والقيود
تحديني للجذور
السيجارة جوّه مني
والسياسة مش في دمي
والجرايد . .
الجرايد هي فيني
والمخده اللي فـ سريري
كرمشت من تحت مني

والأميرة
الأميرة غصب عني
إمتى هابقي؟
إمتى هالقي؟
شغل ليا
مش لإبني
سيك إنت
سيك إنت م التمني
الحاجات ليا كتيره
الحاجات جوّه مني
والخريطة
والجسور
ضعفي حب الانكسار
ضعفي خايف م الظهور
واما بهرب جوّه شعري
بلقى سجني في السطور
كل ما ارسم ليا صوره

تبقى باهته
تبقى سور جوه سور
والحقيقة هي هي
إني دائماً في انكسار

جدار الصمت

ييجي الصبح بآتمنى
معاه الليل يعود تاني
أتوه في الضلمه أسطورة
أخي العيب في دي الصورة
واداري معاها أحزاني
وبات الحلم . .
متغمي
ومستني
يلبسني ثياب الفجر . .
وبيغني
تاريني الناي . . ومتكسر
ومتغرب
وجوه الصمت ألواني
ولسه الطفل جوايا . .
بيسألني

فيه إيه تاني ؟ . . .
وسبت العمر ييخربش
على جيبك
أنا فينك
خيطان الحزن
واندقت . .
على حدودك . .
آدى حدودك
وصوتك فين ومش طالع
وف الطالع . .
كلامي جوّه متقطع
وبس قصيدة مكسورة
جدار الصمت يا محبي
معايا العجز والخير
ما فيش حيله
سوى الفكر اللي بيعجيك ويودي

حالة جنان!!

في المغربيه ..
ع البحر
وف ساعة صفا
أنا قلت أرسم بورتريه
أو مره أكتب كلمه حلوه
عشان أصالح بيها نفسي
وكمان أضحك ع الزمان
بصيت لقيت
والملاح جوّه مني ..
اتشوّهت
لا عدت عارف ..
ده حب
ولآ حاله زى الإمتهان
والعقل كان ..
ولا دا أصله من الجنان

وهو ذا اللي اسمه الجفا . .
ولآ دا نبع وفيه حنان؟
إزاي بحس إني . .
عجوز شايب
والقلب زاهد في الحياة
مع إني لست كنت بحلم
وعودي أخضر لم يبان
إزاي بكون أنا بعشقتك
معرفش حتى أوصف
مع إن عارف إني
محترف فن الكلام
وازاي بتبقي حلمي
من غير أنا ما عرف أنا
وارجع أقولك
كل شيء وله أوان
نفسي أخبط ع البيان
يزعقلي صوت

يقول لي مين؟
أقول له افتح
تطلعلي واحده حلوه
أو يطلعلي جان
أنا بيه أحقق أمنياي
أو أقرب بيه حاجاتي
ولو يرجع عمر فات
ساعتها بس أنا اعرف إني
مش بهزّر ..
إن أنا فـ حالة جنان

حدوتة

عايز احكيك تاني حدوتة
يالآ تعالي فـ حضني ياتوتة
غمض عينك
يالآ نظير
اوعى تنام ولا كلمه تفوتك
نركب مركب فـ بحور هابجة
راح تكسر بينا بعيد
جمد قلبك
خليك راجل
اوعى تخاف إن يطلع صوتك
مهما يكون الريح والموج
لازم تضحك حتى لموتك
مش راح نفرق
مد إيدك
جذف عوم
تيجي ملايكة بجناحات بيض
تاخذنا هناك الجزيره بعيد

فاكر العيد؟
فرحه كبيره هناك عالشط
مش راح نعطش ولا نجوع
ربك عالم
وسط الصخر بيعت قوتك
شايف الأرنب ٠٠؟
يالآ وراه
راح نصطاده
راح نشويه
بص لفوقك
فيه تين بيطلع نار
له جناحات
بينط يطير
خليك ثابت في الأزمات
اوعى فـ مره ٠٠ يحس بخوفك
بخلق فيه
خلي عنيك جوّه عليه
مش راح ياكلك
حرّر طوقك

مش هاشوفك
إلا وفارس
يالآ وراه
اجري وهاته
من جناحاته
اوعى تخاف منه وقوعك
غامر دايماً
زود شوقك
روح الغابه
فيها وحوش
اوعى ف مره . . ياكلك ديب
قاوم . . عافر
مش هاتموت
مين من تاني يقوى عليك
برضه الغابه
فيها غلابه
اوعى . . يبقى قلبك ديب
شايف القرد ينط ازاي؟
مره لفوق

مرّة لتحت
حط ف إيدك حبة موز
راح تلاقيه . . يبقى ف طوعك
شايف الفيل أبو زلومه
ضخم ازاي؟
ابعد عنه
اوعى يدوسك
عايز أنا ابوسك
يالآ تعالى ف حضني ياتوتة
لسه ف قلبي ميت حدوتة
عايز أحكيك تاني وتاني
لسه برضه فيا أماني
بس خلاص . .
الخيطة الابيض جه من تاني
يالآ ننام
بكره احكيك عن وجداني

ده مجرد إنتماء

في المראה .. ومن يومين

١٠٠ سؤال ..

ليه وفين ؟ ..

آه .. منين

إنت تهت .. إنت مين ؟ .. !

السنين متبعتره

عالمين

عدى كام ؟ ..

بيقوا كام ؟ ..

آه .. بكام ؟ ..

لسه تاني في حنين ؟ .. !

الخطوط .. ليه حزينه ؟

الخطوط .. شق طين

الصراع ف المدينه

مين هايكسب ؟ ..

مين هايخسر ؟ . . ؟

والخافظه بين وبين

لسه باقي فـ الإيدين

خط أحمر

خط أبيض

خط أسود

لسه والله ليكي دين

قصدك إيه ؟ . . ؟

لا مافيش

ده مجرد إنتماء

رسالة غريب

العمر ده زي الموج
يجي اليوم .. يضرب يوم
يتكسر كله في صخر الدهر
نسرق منه الفرحه ساعات
وف لحظه غوت ..
بنبص نلاقي
كله يتوه
أو كله يضيع
وبدون مهر
عارف يا امه
كل دا كله
بس ..
الدنيا نصيب
واللي يصيب والّا يحيب
مش راح تفرق

بس أجرب
جائز أقرب . .
مره ف يوم
جائز أصالح مره الدهر
نفسى أسافر
نفسى أكون
مش راح أخون
نفسى أشوف الدنيا يا أمي
وانسى بحلقي طعم السم
اخدت قراري سافرت بعيد
فاكراني سعيد . . ؟
ليل الغربه اخديني يا أمي
زي الغول
عمري ما اقول
اوعى تقولني قصدي الهجر
كان يا ما كان حدوتة صيف
فاكره يا أمي

فاكره زمان؟
لسه ف حضنك يجي بطيف
لسه وداني
بتسمع تاني
فـ عز الحر
كل كلامك
كل آهاتك
حقى الدمع
أتوضى وبه ..
أمسح أحزاني
وتبقى صلاتي وتبقى الفجر
والله الغربه صعيبه يا أمي
وحده وتوّه
كر وفر ..
تعدى عليّ ثواني ساعات
قولى نهار ..
ويعلى اليوم

كله هموم
يجي الليل
ويخلّي الراجل مّا يخر
.....

سافرت يا ولدي ١٠٠!؟
خدت نصيبك
خدت نصيبي
خدت معاك أهو حتى الصبر
قلت يومين
عدت ١٠٠
تجري سنين
جوه سنين
قلت تحن
وانت تماطل
وانت بترفض
قلبي يئن
أرجع يا بني وارسى لبر

أرحم خوفاً
ووحده وعجز
حتى حيطان الدار بتنادي
ارجع أمك عايزه لحذو . .
يمسك بيها
يشد إيديها
يحط النقطة ف آخر السطر
فاكر الدار ؟ . .
ولا نسيت ؟ . .
من يوم ما مشيت
زى ما هوّه . .
وف كل ركن بتقعد فيه
أحن إليه
يتكلم عنك
آه أنا منك
يحكي شقاوتك وانت صغير
لما كبرت وكنت عنيد

رحت بعيد ..
لسة صورتك فوق الحيط
أحلى منها جوة الصدر
ياما و ياما .. لملمت جراح
كل دا راح ..
وطويت أحزاني ..
لحد ما جيت
في الحلم تقولي
افتحي بابك
فقت .. صحيت
وفتحت الباب
ولقيت الليل بعيونه الحمر
أرجع تاني
مهما يكون الجاه والمجد
اعرف إنه الآخر فاني
ولمّا حيكبر سنك بيك
أعرفك إنك كنت الجاني

نفسى أشوفك قبل ما اموت

ومحدثش فينا ضامن عمر

إيه يا ضايا

هنت عليك

هنت تشوفي وكلّي خضوع

بُست إيديك

ارجع يا بني

فلذة كبدي

ارحم ضعفي

ارحم أم

ارحم كل ليالي العمر

.....

بتندهي يا امه

أيوه أنا راجع

عمري ما اسيب من تاني الدار

بيني وبين الغربه دي تار

هافضل تحت أقدامك يا امه

أمسح حزنك
أمسح دمعك
أمسح كل ليالي السُمر
غصبن عني
خدتني الدنيا
دب الشيب
نفسي فـ حنة عيل يا اما
نفسي فـ واحده بعيون سُمر
راجع تاني بعد يومين
بس يعدّو
خلاص مخنوق
عشت غريب
وأخيراً جيت
لايس أبيض وفـ صندوق

رسالة من أوزوريس

ألف لأه ٠٠ مليون آه
ياللى هناك ع الشط بعيد
مستيكى فـ قلب الضلمه
مستيكى فـ قلب تابوت
هاتي النوته
اكتبي فيها
قصة حي
قصة عهدي
ارسمي فيها ميزان العدل
اكتبي إنه تمته الموت
افردي سطر
عايز أنا خصرك
لسه سؤال ملفوف على جسمك
عايزله إجابته ٠٠٠
فين القصر وفين التاج؟

لَسَه في قلبي ١٠٠ محتاج
لَسَه ونفسي يعلى الصوت
جوه تابوت
هافضل أرتم
نفس الفكره
هافضل أرسم
صورة لبكره ٠٠
حييقي إيزيس
فاكره أنا مين ؟!
حكايه قديمه
عدى عليها العمر سنين ٠٠
وفد قلب الليل
لَسَه و باقيه تنشر ضي
لَسَه الكلمه
واضحة صريحه
فـ ورق التوت
ألضم فيها حرف فـ حرف

أصرخ أحبك
أرجع أقولك
مش هاستسلم
مش راح أقبل
إني أموت
هافضل أرفرف
روح وتعافر
تنشر حب وعدل وخير
وف مملكتي
مش راح يبقى فيه مكبوت

.....

- آه أوزوريس ..

أنا لسة إيزيس
إياك فاكر ممكن أنسى
ولّا أخون
ولّا عليّا يوم هاتهن
لسّه وقلبي زي ماهوه

فيه تكوينك
فيه من جوّه
لسة ونقشك جوّه ضلوعي
آه من خوفي
يوم ما الدمعه قيا تموت
وانا في سكوت
جايله حنوط
جايله ألملم حته بحته
حافيه ورجلي
خايفه تدوس
شير فـ أرضك
وانا في خفوت
من غير صوت
لسّه وبسأل
ازاي أرضك
شربت دمك
بدل الزرع ها تبت شوك

وازاى حبك
يبقى تابوت
إيه يابوت ١٩٠٠
فين أحضانك
بعد الفرحة
تطلع منك ريحة موت
.....

حبيبي إيزيس
عارفه مكاني ١٩٠٠
رايح أحكيلك عن أحزاني
بداية السطر
حسيت وكأني
ضلعي اتكسر ٠٠ اتفتفت
تحت جدار الغدر الساكن
من غير لكن
عارف إنسي
لسته وعائش

بس وحاسس
إني بموت

كسرى قيودك في مره
فكّي سجنك
مش ف حضني ولا حضنك
دي حكاية من زمان
الخوف عتش عليها
واللي فيها
واللي بيها
اتبني سور الحياه
واللي كان ..
النهارده الحلم
راح يبقى لي طفل
طفل راح يبقى ولد
والولد راح يبقى أب
وأبوه راح يبقى جد

جده قال . .
كان زمان
في بحور العشق كنا
اتحكينا في ألف ليلة
وافتكرونا إن اتسينا
واتنسى كل اللي كان
أبدأ . . عمره
ما . . كان
غيري اسمي
غيري اسمك
رسمي هو اللي حبيبي
هو رسمك
والشخايط تفهم
ونتوهم . .
إن إحنا مُتنا ع الحيطان

طفل شارع

من غير رياء
ولا كبرياء
وبدون خجل
لو تقرب راح تشوف
صوره حزينه في الوطن
وبدون رتوش
وبدون وشوش متبسّمه
والمحتمل
بدون حدود . .
وبدون مكان . .
وبدون تاريخ للأزمنه
صوره في شهاده مقطّعه
الاسم طفل . .
لكن حقيقه مؤلمه
الأم حاره
والأب شارع

والمكان ٠٠ ١٩
تحت الكباري المظلمه
ولو تقرّب ٠٠ ١٩
راح تشوف
محتاج حنان
محتاج أمان
محتاج قلوب مؤمنة
وفي الشوارع ٠٠ طفل يسحبي وطفل يلعب
أو طفل يضحك ٠٠ طفل يبكي وطفل يغلط
أطفال بتحنى للزمن
ملاحها ليه ٠٠ ؟
متكسّره
متخدره
فيها السواد فوق الحدود
ولو يقابل يوم ودود
لكن هدومه مقطّعه
أنا شفته مرّه في الجنّين ٠٠ قالو نايم
بيشد كُله معقره
ولو تقرّب

راح تشوف
بُص فـ عينيه راح تلاقى ..
الدموع متحجرة
مكتوب عليه
يعيش حزين
وعا الجبين أحلامه ليه متصغره
رغيف وهدمه
ونومه غير متشحوره
وكل همّه
طريق تبقى آمنة
أو الهروب م الأكمه
وبرده شفته
في ليل شتا
يستخبّي من المطر
وعا الرصيف
وجوه حاره
وتحت بيت هدّه الزمن
وجوه ليله من الليالي المظلمه
أنا كنت نفسي ..

أمد أيدي
أديله لحاف يتغطى بيه
وخفت منه . . وخاف وقال
أنا غصب عني
أوعى تقول دي بلطجه
ملعون أنا
مرفوضه صورّه في الوطن
ملعون يا ظلم المجتمع
والمتبع
إني أنا
واحلم أنا
أحلام سعيده مؤدبه
سمعتة مرّه
يصرخ يقولها
يامساجد ياكتايس ياغرايس
الكل دايس فوق جيبني
أنا برضه إنسان . .
ليه ينادوا طفل شارع

عدى القطر

توت ٠٠ توت
القطر يفوت
والعمر يعدى في لحظات
لسته إمبراح في أحضان أمي
كنت بيات
كنت يدوب
بقدر أدوب
واتعلم نطق الكلمات
صحيت الصبح
بصيت و لقيت
سنوات العمر
مربوطة في حلقات
قلت يا وعدى
العمر يعدى ٠٠ ؟
العمر أهو عدى وفات

توت . . توت
القطر يفوت
والعمر يعثي في لحظات
علمتني الحب معاك
علمتني الحرية كمان
اوعي تخافي من الأيام
قلبي يعرفش الكراهيه
ولا يعرفش الخوف
ولا يعرفش اليأس
قلبي في الحب مالوش درجات
وان كان شعري عجز شاب
لسته على سريري بقول حكايات
عــــــذى القطر
عــــــذى وفات
عذى سريع
زي الطلقة
زي الريح

كان بيطير . . من غير جناحات

عدى وساب لي وراه حكايات

حكاية أرض

حكاية عرض

وحلم كبير . .

عاش في الضل لحد ما مات

والله ما مات

لسه وعاش قلب بينبض

مع كتر الجراحات

ولآ تكونش يا واد خرافات

عدى القطر

عدى وفات

عدى وساب

خلق كثيره

خلق غنيه

وخلق فقيره

وخلق بتشقى ليل ونهار

لاجل تطول حبة جنيها

ناس و أمينه

وناس حراميه

دول مش ميه

دول ألوفات

يبقى سارقنا وعامل بيه

واما عنيا تيجي في عنيه

يشخط فيا

ايه شحات ٠٠ ١؟

واما تقوله غلبان مات

يرد عليك

دي تفاهات

طبعاً فاهم دي حركات

عــــــدى القطر

عــــــدى وفات

عدى وساب لي غبار و تراب

طفل صغير

جلده مكرمش
ضهره ده محني
يحلم يكبر
من غير أزمات
بس يعيش من غير إهانات
أبدأ . . أبدا
دى خرافات
عــــــلى القطر
عــــــلى وفات
عدى وساب
ألوفات . . ألوفات
واللي شاغلني
ست عجوزة
جوّه عينيها الصمت يصرخ
إيه يا وليدي . . قلبك مات . . ؟
ولّا تكونش الغربه حينه . . ؟
عارفاك قاسي

تقدر تنسى
عارفة إن الدنيا صعبه
قلب الأرض اتشقى يا ولدي
حتى اللون الأخضر مات
عذى القطر
عذى وفات
عذى وياما تفوت قطورات
وش القطر ده بالأحضان
ضهر القطر ده كله أحزان
ونبقى زمن . . . وزمنًا فات
عذى القطر . . . عذى وفات

كلمة في ممر الموت

كلمه في ممر الموت
قلت أكتبها
أو أحكيها
حروف جدران
الساكن سجان
زنزانه مقفوله
من غير قضبان
زي الجان
تيجي الرعشه
في عز الحر
وندوق المر
نعرف إنك كنت الخوف
كلمه في ممر الموت
من غير صوت
ترعق فينا

نحلف
نكذب
نخلع توب العُهر
نلبس توب الطُهر . .
الساكن فينا
ساعتها وبس . .
نعرف إنك كنت الخوف
كلمه في ممر الموت
تولد إحساس
ياكل أحاسيس
ينهش وف عضمك
ينخر سوس
تجري تدوس
على كل حلاوه
وجوه في حلقك
تلقى مرار
ماتلقى فرار

تعرف إنك كنت الخوف
كلمه في ممر الموت
مولوده أيام الغوله
وانا وصغير
معقولة تشد الحبل . . ؟
ممنوع لعب الأوله
والشخبطة عالحيط
ارفع إيدك
اكتب عالسبوره
كلمه في ممر الموت

لسّه بعشق السُّكات

قلت ألملم كل تواريجي القديمه في بصتين
هما نفس البصتين
فـ الصور والذكريات
منها عاش
منها مات
قلت أكتب كلمتين
بس هما كلمتين
وعالسطور أرفع رايات
دا الورق م الحبر باش
مش حكاية دي حكايات
كنت نايم حبتين
لأ مَيّت من سنين
شفت نور . . أيوه نور
لكن العتمه تبات

قلت أصحى ولا انام .. لأ بلاش
دا الكفن توب اللي مات
روح يا صمت الميتين
جوّه صندوق م الغويط
لّه كالون وألف سور
إيه يا عمري كله فات
كله راح .. راح بلاش
آه و آه .. لسته بعشق السكات

لو تحبيني

لو تحبيني ..

اعتقيني

اكتسبي بين سطورك

طير يغني لكل وقت

يا حياتي سبني أحبك

أو مرّه أحب غيرك

يعلا صوتي

قلبي رافض أي صمت

عايز أحبك شكل تاني

مش زي أي حد

لو هاموت أنا بين شفايفك

سبني أحبك جد جد

لو تحبيني

سبي قيا أي رغبة للجنون

ارمي نفسك فوق ضلوعي

خريشيني ..

اكتبيني في التاريخ

لسه باقي سندباد

لسه عاشق للفنون

لو تحبيني

سبيني مره أرسم لك خريطة

والشريطه اللي فـ ضفايرك

راح أسيها فوق جبيني

امسكيني لأ .. سبيني

لو تحبيني

اسدلي يالآ الستار

لو كان

جوايا بر كان

بيفور

بيدق

يهد حيطان

دا انا انسان

لو كان . .

جوايا . . عطشان للفجر

يتسرب جوه عيوي

أو يبقى فهار

أو ضليله في العصريه

يقي آدان

بس . . !

قبل العمر ما يجري

أنا نفسي أشوفك

يا احلى الأحلام
تتحقق
وتكسر زنازيني
بتفوت
وتعدّي
كده تبقى حقيقه
ومش أوهام
بس ازاي ؟ ..
دا انا إنسان
لو كان ..
فاكرني زمان
أنا كنت بانام على رجلين أمي
واروح واروح
كده في الأحلام
وفي حلمي
أنا كنت باثور
أغضب

أقرّد على الأوضاع
بس خساره
الحلم أهو ضاع
لو كان . .
أهو ناس بتقول . .
مقدرش يخون
مقدرش يكون . .
ولا كلمه جوه سطور
في ورق بهتان
واهو ناس بتقول
عامل فارس
كان بيحارب . . والسيف مكسور
كان بيحارب . . وسط نسور
من غير جناحات
ولحد ما جات
كده ضربه قوية قد الكون
كان مجنون

و ف وسط سُکاته لَمْ جراحه
تحت حیطان
أو تحت قصور
وبصرخه قویه
عدت سور
کان بیقول
جوایا برکان
بیفور
بیدق
یهد حیطان
دا انا فان
لو کان

مش راح أموت..

عائش مجروح
وبصوت مبحوح
بصرخ وبقول
آه يا زمن النوح
مطرح ما بروح
بلاقيه قد مات
عائش إنسان
وف كل مكان
وبروح فنان
بنقش ألوان
ف ضلوع جسمي الملفوف حكايات
عائش أو فارد جنحائي
وبصاحب كل جراحائي
وبحبك يا زمن الآتي
وبجلدي عملتلك رقاً

وبعضمي الهش عملت نياي
يالآ يا جسمي المسلول
دوس على كل آلامك دوس
وغني أجهل غنواي
عايش وبجب الناس
والناس مليانه وسواس
والوسواس قتل الإحساس
والإحساس محتاج درآس
والدرآس محتاج لدريس
نزرع حب يالآ يا ناس
علم .. بلم .. مهما تقول
هافضل أرتم بالحكايات
عايش ويلملم أوهامي
أوهامي تعاند أحلامي
أحلامي ساقيه لأيامي
أيامي بتحلى كلامي
والآي أسعد أوقاي

والتوب مشدود عالكد
بالكاد بيغطي الأزمات
عائش . . وبضفر فـ حروفي
اتزيني يا سطوري وشوفي
وحروفي بتزود خوفي
والخوف متقيّد بطموحي
وطموحي للغد الجاي
عصفور ويزقزق على غصني
غصني مفروود على كفي
على كفي خطوط عمري الجايه
وعمرى كله لحظات
عائش . . مبسوط وبغني
الغنوه مخلوطه بدمي
لحنها ييفجر فتي
والفن بيركه جني
والجني عند العرافه
تضحك ويايا وتقولي

حلوه وصيه في النني
تنادي عليك ادخل سجن
عش العصفوره يقضي
أو كلمة حب تغطي
والبنت الحلوه توديني
تربطني في ساقه تخلي
كده الف . . ألف . . تغميني
أندم لو افوق من حلمي
عدي يا سيني ووريني
راح أعيش وأموت . . بس آديني
أنا عايش بس لحيني
حتى لو كانت كلمات

مُنَايَا بَسْ تَحْسِي

مشدود . . مخنوق
مربوط بهموم
متعلق بجمال النور الدايبه
متعلق فـ نجوم
تتسحب
تتباعِد
تتخفي
تنده على القمر الغايب
تكفن فـ غيوم
تكفن فـ سواد
أنا كلّي عناد
أحيا من الموت
أخلق م الضلمه دي نور
حلمي المحموم

يرحل لبعيد
من غير مواعيد
يقصر ٠٠ يتقصص
يرجع ٠٠ ويعود
يكبر ٠٠ نتوحد
نستنى ليوم
يجرفني الشوق
تتمد الخطوه
ترجع لألوف
أصرخ وبجك
من جوفي ما بتطلع
ملعون الأمل المتور
ملعون الحب المكتوم
ملعونه حروف الخوف
ملعونه كلمه ما بتوصل
ملعون القلم المكسور
ملعونه الدنيا وما فيها

من غيرك جئت ما أدخلها
ولو حضنك نار برضو أنا فيها
خليني حطام
وبجلك
ونقشتك
ورسمتك
بجروني
من خوفي
في ضلوعي
ما تشوفي
وكفايه
جوايا
ومنايا تحسي
إني بتألم
وبدون ما أنا أتكلم
نفسي أكون مفهوم

مين قتل الحلم؟

قدّامى الحلم
ومتعلّق

وانا مشدود

ممدود ع الأرض

ومتجرّجـر

متبرّر

جوّاك الذنب

مين قتل الحلم ٠٠ ؟!

موقوف ف حدودك

متسمّر

متدمّر وبمد اليد

ضميني في حضنك

لو مرّه

من برّه

راح أموت م البرد

مين قتل الحلم . . ؟!

مصلوب على بابك

متكسر

متضرّ في حدودك سلك

شخايط على جسمي

من رسمي

فين اسمي . . ؟!

مزروع متمرغ فـ ترايك

وحصادك

كان عمري الجاي

مين قتل الحلم . . ١٩

مجدول الحزن و ف ضلوعي

متمدّد

متودّد ف العتمة ليد

تربطني

تكتفني

من جسمي النازف وتاخديني

من يد ليد

مين قتل الحلم . . ١٩

وقتلني . .

وانا مدبوح . . مَيّت

متعقّن . .

متكفّن .. بحروف الخوف

والخوف متسلسل ف ألوف

مكشوف ..

مين قتل الحلم .. ؟!

ما .. تشوف ..

مين قتل الحلم .. ؟!

يوم سبوعي

ماما يا ماما

عمري يومين

راح الشال الأبيض فين ؟

ليه لفاني الطرحة السوده

حتى البوسة

تترل دمة

فوق ع الخد

تحرق جلدي

تشق طريق

قولي الآه

ليه تتمد

ليه الكُل سواد فـ سواد

ليه القُرب يزيد فـ بُعاد؟

لِسَه رضيع معرفتش حدّ

ليه مشغوله ؟

ليه سيّاني؟

ليه رافضاني؟

مهما تبعدني حُضنك تاني

هافضل أحن إليه ومجد

إنت الكون

كل الكون

مهما يكون

نفسي ومتك لمسي يد

ماما يا ماما

عايز انا بابا

فين الشمع ودق الهون؟

كل الخلق بتفرح تسعد

وانا ف سبوعي أبويا يموت

الفهرس

٥	إهداء.....
٧	شكر وتقدير.....
٩	آخر رسائل سندباد.....
١١	آخر لقاء.....
١٥	انكسار.....
١٩	جدار الصمت.....
٢١	حالة جنان!!.....
٢٥	حدوة.....
٢٩	ده مجرد إنتماء.....
٣١	رسالة غريب.....
٣٩	رسالة من أوزوريس.....

٤٥شخايط
٤٧طفل شارع
٥١عــذى القطر
٥٧كلمة في ممر الموت
٦١لسه بعشق السكات
٦٣لو تحبيني
٦٥لو كان
٦٩مش راح أموت
٧٣منايا بس تحسني
٧٧مين قتل الحلم؟
٨١يوم سبوعي

